

প্লাস্টিক কারখানার দূষণে ৬৬ গাভী-ছাগলের মৃত্যু
নয়া দিগন্ত ডেস্ক ১৮ জুন ২০২২, ০০:০০

গাজীপুরে একটি প্লাস্টিক কারখানার দূষণে ক্ষতিগ্রস্ত হয়ে পড়েছে এলাকার পরিবেশ। স্থানীয়দের অভিযোগ, কারখানার দূষণে একটি খামারের ছয়টি গাভী ও ৬০টি ছাগল মারা গেছে। এ ছাড়া কারখানা থেকে নির্গত গ্যাসের কারণে হচ্ছে বায়ুদূষণ। ফলে চরম দুর্ভোগে রয়েছেন এলাকাবাসী।

সাদা বর্ণের এসব ডাস্ট এলাকার চারণভূমিতে ছড়িয়ে পড়ে। গরু-ছাগল চারণভূমির ঘাস খেয়ে অসুস্থ হয়ে পড়ছে। মারাও গেছে অসংখ্য প্রাণী। হাঁস-মুরগি, পাখিরাও দিন দিন অসুস্থ হয়ে পড়ছে।

স্থানীয়রা জানান, তারা একাধিকবার কারখানা কর্তৃপক্ষকে তাদের অসুবিধার কথা জানিয়েছেন। কিন্তু কর্তৃপক্ষ কোনো ব্যবস্থা না নিয়ে উল্টো তাদের এলাকা ছেড়ে চলে যেতে বলেছে।

এ ব্যাপারে গাজীপুর পরিবেশ অধিদফতরের উপ-পরিচালক মো: নয়ন মিয়া বলেন, কারখানাটির বিরুদ্ধে অভিযোগ দেন, তাহলে আমরা তদন্তপূর্বক ব্যবস্থা নেব। কারখানাটির পরিবেশগত ছাড়পত্র আছে কি না জানতে চাইলে কিছু বলতে পারেননি তিনি।